

新甯縣志卷八

序

修理文廟序

周金紳

夫欲維持道脈敦崇文教

至聖之類宮可任其荒穢不治乎

國家尊禮

先師至隆至渥自成均而下一州一邑皆建學明倫春

秋歲支正項以展祀事制綦備矣而偏隅僻壤

狃於見聞遂致有其名而忘其實視以為歲事之

新甯縣志

卷八

藝文序

恒而褻越從之余初下車謁

聖廟竊見戟門內外鞠為茂草兩廡位次參差心竊

傷之不禁曰是固有司之責也此之不謹

朝廷設官之謂何夫人有德於一鄉有功於一邑後人

追思敬慕猶且崇宮室備牲牢歲祀之惟謹矧聖

人道高德厚千古詩書禮樂名教綱常賴以勿替

吾儕幼讀其書長修其行一旦入官居士民之長

而忍任其陵夷隕越竟如是耶爰鳩工庀材安神

龕飾丹雘悉增文采非敢曰觀瞻粗具執事之光



也實迫於中心誠然有不如是不安者爾雖然新甯固三川下邑卽量爲修葺會不足比烈於大邦但惟虔且潔庶幾足以棲神可以展敬而規模狹隘則限於地之無可如何所謂隨分自盡者非歟且夫覆幬萬世者聖德之隆也博稽典籍者學士之司也自今而後務使孔門諸弟無先後踰越之譏歷代名儒無世序凌躐之紊一經訂正永爲定式此則余高山景行之意云嘗考祀典未祭之先齋三日祭之日粢盛必豐牲牲必肥膾醴酒必馨香執事有序對越有度陪祭盡禮不舒不迫禮卒告成神人胥悅詩曰享祀不忒祀事孔明殆謂是也若夫朔望之香燈宜整肅歟堦墀之蔓草當剪剔歟垣廡之欹頽亟繕葺歟風雨之淋漓勤補塞歟隨時隨處因地制宜是在董其事之君子

改建文廟序

東鄉知縣 徐陳謨 字勉
蘄水進士

天下皆知尊崇乎聖人而不知所以尊崇之故知所以尊崇聖人而不知尊崇之有裨於政治之故是以爲學者日誦聖人之書而究無與於聖人之道爲治者日拜跪於聖人之前而卒不成其爲治其故何哉患在徒事尊崇之虛文而不知有尊崇之實心也夫爲治之術必本諸學爲學之實必衷諸聖人之道治不本於學無以爲成化之基學不衷諸聖人之道無以爲興革之準我

聖朝崇儒重道自都城下逮郡邑莫不建立

聖廟未修者新建廢壞者整理規模宏敞體勢尊嚴庠序相望絃誦相聞伊古以來蔑有加矣爲令宰者自無不各彈心力勉圖修葺然嘗求其治之本諸學政之協於道者十不獲一焉則豈非務虛文而無實心之明徵也哉吾友謝君鶴齡年方壯而優於才裕於學以嘉慶丙子登賢書庚辰捷南宮出宰西蜀權篆淙城始至之日卽以素所得於學者本諸聖人之道而爲治勵清操尚風節整疲剔弊

政治一新邑人士咸欣戴焉君既奮然思有建於
時因先以崇學爲首務謁學宮見棟宇傾頽地勢
低窪辨方非宜遂倡捐廉俸集邑矜士議詳請改
建移於城北費計萬金經八月而工竣基址高朗
廟貌嚴肅不獨以示尊崇之體且欲推尊崇聖人
之心使一邑咸歸於教化之中士皆敦夫品節民
皆洽於禮讓於以見其平日之所得於學與其踐
履聖人之道相比附誠不等於俗吏之崇尚虛文
而專以實心爲則倣聖人之本他日之功施社稷

新甯縣志

卷八

藝文序

綱

德被生民舉可於君信之君爲人謙恭退讓求治
如不及撫治未幾其清操已共信於民故方議修
舉而邑紳之尚義者無不踴躍樂從以萬金之工
程不改歲而集事信乎信而後勞古人之言不子
欺乎功既訖君因邑人請囑序於予予素叨隣照
心勞撫字幾無暇日學殖已荒於簿書復何能文
足以表君之羨惟既承明命又欽君能超出乎俗
吏且喜邑人士明於大義感君之德政而樂爲趨
事也因不揣固陋而爲之序

改建文廟並奎閣合序

學師資陳鳳廷字來陽舉人

蜀之學始自文翁成都石室至元朔五年詔天下郡邑皆設學而州縣之學立蜀學之建廟肇自成
都禮殿及貞觀四年詔天下郡邑皆建

孔子廟而州縣之

聖廟興新邑之建廟設學明以前俱無考按通志載有明一代若雷正之忠諫直言周秦之清官第一與夫熊希古趙鏊朱鵬雷震張芳輩忠孝義勇彪炳當時人才之盛如此學宮之修舉可知迨流寇亂

新甯縣志

卷八

藝文序

五

後人民寥落

國初以其事簡歸併梁山雍正八年始復縣知縣竇公容遠訓導苟公鴻儒領帑建廟於中城倉卒草創地卑制狹益以嘉慶教匪之變城駐重兵既風雨之久蝕加戎馬之蹂躪茂草之傷於斯已極戊寅秋予以司訓至邑即日祇謁仰瞻周視慘目警心竊嘆廟毀若此 聖靈奚安 聖靈弗安人文胡振屢以建修勸多士並亟言於縣尹皆是之而畏其難辛巳秋謝侯鶴齡權縣事下車趨謁慨然以

鼎新爲已任邑人士聞之嚮請侯爲據情詳 憲
均報可卽函訂達縣胡竹塘明府名光瓚者假公
越境來相地胡固偉儒更精風鑑之術凡有興作
皆屢驗侯之用心不其至歟地既定改遷城北於
是尅期鳩工捐廉百五十兩先爲閣邑倡而一時
士若民同心響應咸願樂輸每糧一斗捐錢六百
文爭先繳納恥於人後經始於壬午春正八閱月
而訖工計費萬金自崇聖祠大成殿東西兩廡戟
門櫺星門泮池宮牆明倫學廨以及忠孝節烈諸
祠胥擴其基而厥其局龕座牌位帳幔祭器無一
不備巍乎煥乎舉百年來卑陋傾頽之象忽轉爲
崇高壯麗之觀非侯之明於治勇於義亦烏能臻
此哉顧侯以爲學宮旣新則奎閣宜建方謀續成
旋以瓜代去意缺如也幸嘗任吳侯寅齋適有同
心於到官之次年甲申仲春集諭士民謂教化之
本學宮爲先科甲之權 奎星實主之今學宮新
矣奎閣惡容緩乎爰捐清俸二十五兩並募紳耆
之殷實者量力捐輸諏吉定方得地於城外東北

角砌石架木費逾千金數月而成危樓接漢飛閣
凌霄巍巍乎又爲新邑增一鉅觀矣父老子弟舉
欣欣然詣予齋而致詞曰吾邑學宮之地文風之
頹久矣今一旦振興兩侯之惠也兩侯之於新何
異文翁之於蜀蜀至今不忘文翁吾邑安能忘兩
侯哉是宜勒石以示後人予乃諭於衆曰蜀自文
翁興學一時人才蔚起號西南齊魯如司馬相如
張寬輩皆以文章顯名於時今邑人感兩侯之惠
舍舊圖新吐華揚秀亦將有如司馬張寬之奮起

新甯縣志

卷八

藝文序

七

天衢固已然吾聞三代之學皆以明倫苟徒誦習
詞章弋取名位切切然艷羨夫高車駟馬欲以震
驚閭里而誇耀一時抑末也孝弟忠信生人之大
本存焉聖賢之大道著焉諸生勉乎哉觀數仞宮
牆當思宗廟百官之美富何在瞻六佾樂舞宜念
金聲玉振之醞釀奚存修聖人之廟卽以修聖人
之道樹高峻之閣卽以樹高峻之操力持於綱常
名教之閑而毋或蹈夫沮詐浮華之習親其親長
其長不欺已不欺人將三代之英由此其選又何

司馬張寬與前明雷趙諸人之不可復見於今日
乎斯乃無負兩侯之振興與邑人之尚義而司訓
者亦庶幾藉以塞責矣諸生勉乎哉謝侯名玉珩
陝西安康人丙子舉於鄉庚辰成進士現授昭化
縣知縣吳侯名協雲南保山人壬子舉於鄉丁丑
大挑一等現任新甯縣知縣董其役者貢生潘正
謨羅模武生尹大醇張國新文生陳文爵曠學湛
監生孫世授郝文會張錫衡例得脩書

重修文山文筆塔序

刁思卓

小山別大山鮮吾知與大山不相聯屬大山宮小山霍吾知大者圍繞乎小小山岌大山垣吾知小者高過乎大履齒所及踵山水之方滋無廢墜之修舉則搜奇索勝之常軌非虎變豹變之寶象也丁丑春正月余至新甯適邑侯崇川李葆堂先生奉檄試士先二日以文山命賦余質其地有知者援余循城俯堞以望距治南十里有奇爲聖廟縣署之面山有鮮有霍縣亘截業正峙一峯拔地

新甯縣志

卷八

世望文序

九

倚天秀出班行有人口乎垣而文山以名相傳人文盛時造數級浮圖鎮其地迨浮圖廢後自復設縣治以來而甲乙科無聞焉者余疑造物之爲有無从矣學者之於文也有書有筆萬夫辟易故曰讀書破萬卷下筆如有神雖言筆從書來其實善於文者不在讀書之多多讀書多者或不善於文則筆尚焉譬之是山爲書言浮圖爲筆今去其筆無以爲陣何謂之椽無筆無以逆吾筆而欲其橫掃也是猶不舟而濟不火而熱庸有冀乎不甯惟是尤溪

有文公山而朱子實生其縣則造物之爲真有而地靈人傑之說或非無據知者曰李邑侯將惠分清俸爲倡期於必復君曷序之爲邑士人勸余曰賢哉李侯之用心聞侯忠信明決片言折獄至講學明倫娓娓數千言不見其倦又非泥於形者言特以不鄙夷其民勤勤懇懇意猶未慊凡可以利人民者不憚求其說而成之昔謝康樂不識雁蕩說者以爲山之顯晦有時茲山古蹟待侯而復位正乎南文明之象非山之顯晦實新邑人文顯晦

新甯縣志

卷八

藝文序

十

之關鍵也諸君子將有意於其文蔚其文炳乎上之經天緯地之文制禮作樂之文觀乎人文以化成天下必有鍾茲山之靈以鼓吹休明者賢侯之風與文山並峙而諸君子聞風興起志在復古諒不俟顛蹶之請望拜之謁也余雖不文猶濡筆以觀其成

閩人新建

天上聖母廟序

黃位斗

自古有功德于民而能禦災捍患者皆享祀百世要未有若

天上聖母之功崇德厚昭然在人耳目間者也攷

聖母秀毓湄山自誕降以至飛昇歷著靈異載在顯聖錄者不可殫述由宋以後錫命寵頒爰及我

朝尤加顯赫以故河清海晏運道疏通屢經陳奏

綸音疊沛徽號頻加至上配蒼穹追崇先世凡湄洲厦

新甯縣志

卷八

藝文序

十一

門清口等處皆奉

詔建廟春秋編入祀典官爲致祭迄今仰璇宮壯麗寶

樹披離梳樓指旭日以爭輝天閣干青霄而直上

猗歟盛哉蓋

聖母功德緯地經天利賴在天下萬世不僅及八閩已

也淙城爲川東一隅閩人隸籍者寥寥無幾向惟

三甲廣福場建有

天后行宮閩人崇祀于斯乾隆間處士蘇某等二十七

人捐積金錢數百緡擇得南街城邊地一區堪輿

家以其方向未宜是以欲建廟而未果時有耆民
曾承貫鄧有德國學生邱國忠聞其事偕來倡議
購得東街某姓舖房數間及隍廟袁姓田遂卜吉
焉適余奉檄宰斯邑諸公來謁備陳巔末余聞而
壯其志因捐廉倡始閩人皆各欣然樂從鳩工庀
材經始于癸巳夏月中後爲二殿前爲樂樓繚之
以牆甃以磚石飾以黝堊丹漆因功程浩大計無
餘貲余復重爲捐廉而邱鄧二公慨然解囊略無
難色自備資斧量度監視務使美備而後卽安共
實金碧輝煌洵足以答

神庥而敦鄉誼然則斯廟之建非蘇公等之錙積寸累

固無以倡始于前而非邱鄧二公之不吝不私盡
心盡力又何以觀成于後乎顧廟宇旣成而供奉
之費宜備計閩人所樂捐者除經費外僅留處士
邱國亮捐繳當價二百貫并南街原址廟後舖房
收其租息以備晨夕香燈經久之計余固知其必

有成始而成終者諸公其勉乎哉至于樂捐姓氏
成數若干當勒石以垂不朽無俟余之復贅也因
盥手濡毫而爲之序

新甯縣志

卷八

藝文序

十三

孝經管窺序

竇容遠

淵哉孝經之緼乎明天經析地義昭民行也舜文武周孔曾之傳於是乎在予小子何足以窺之然身體髮膚受之父母一有毀傷不可以爲子卽不可以爲人又烏可不求所以窺之伏讀先乎太史公闡義一編特標戰兢十二字爲歷聖傳授心法予小子因卓乎其有以窺之矣蓋戰兢者卽經所云不敢之義也窺之天子本不敢之心以立極而德教加於百姓刑於四海故得萬國之懽心以事

其先王窺之諸侯本不敢之心以保社稷和民人故得百姓之懽心以事其先君窺之卿大夫本不敢之心以守宗廟事一人故得人之懽心以事其親窺之士本不敢之心以事君則忠事長則順故能保其祿位而守其祭祀窺之庶人本不敢之心以謹身而節用故能養其父母合十八章之義而窺之必人人存一不敢毀傷之心以自致其能愛能敬之事則人人可以立身而行道人人可以揚名而顯親不愧其爲子斯不愧其爲人也不然

母全而生之子不能全而歸之尚得覩然自立於
兩大間乎此戰戰兢兢如臨深淵如履薄冰先子
指爲心法而不可易者也歲在辛亥冬杪予小子
讀禮之餘披閱遺經不勝凜凜危懼爰隨筆劄記
用自警省幾幾乎以管窺天矣謂舜文武周公曾
之傳竊有所窺也遠也敢乎哉

樂善序

周金紳

古語云與其爲善於鄉也不如爲善於里夫爲善於里其所及者幾何然使天下之大各有以厚其黨里而孳孳焉樂此不倦民德粹而風俗醇亦甯外是哉且自時俗之日趨於薄也好行其德者少而封殖自私殆常情乎如是則比閭中無論當與當舉之事膜而視焉卽水旱災祲目覩流離失業亦彼此不相卹此其人固自愛其財而不知已爲無足重輕之人矣新邑有江伯能者篤實謹厚人

新甯縣志

卷八

藝文序

十六

也生平敦孝友主忠信無卮言飾色而又慷慨好施一切蠲賑平糶修理橋梁道路無不欣欣然及時行之他如還金喜捨焚券掩墓諸善事又不可以枚舉豈有所爲而爲者耶又何以人不肯爲而彼獨爲之耶余嘗微而伺之知其出於中心之誠然若不如是而早夜不安者夫邑有敦仁好義之士長吏隱受其福古者大道之行所以漸涵浸漬以至於化成俗美其初亦不過日貨不必藏於已力不必私於已而已今江伯能真無媿三代之民

歟余撫是邦之明年伯能復捐三百金之產以供
梓潼宮 武廟 城隍廟之香燈用垂永久心竊
嘉之因思紫陽所語爲善最樂伯能何脗合如是
耶積善之家必有餘慶理豈或爽方今伯能年登
大耋諸子名列膠庠諸生濟濟讀書上進一生善
行微特足勵薄俗而返淳風卽福善之應將來甯
有量歟書以爲通邑之實心行善者勸

捐設普市義學序

前訓 徐蔭遠 松坪

聞之學以明道天下無道外之人即天下皆學中之人皆學中之人而有幸者皆氣拘物蔽歟此其間固自有說焉大抵豪傑之士乃能自拔於庸流不以空乏其身而氣餒不以拂亂所爲而情遷在昔如耕莘釣渭版築魚鹽尙已降及後世賃舂乞食鑿光為傭囊螢映雪販牛牧豕境愈困而見愈超人愈貧而志愈奮夫非所謂豪傑之士者耶然豈盡而能若是乎吾知天地靈秀之氣固

新甯縣志

卷八

藝文序

十八

不能盡鍾盡毓而一洩無餘也則彼華門圭竇之家土飯塵羹之域既不聞讀書之可貴其父兄又苦於送學之無資雖有忠信卒歸暴棄可勝言哉是卽造物亦難平其憾而不能不待留心世道者之補其缺也普市諸君子深念乎此爰推欲達之仁心集爲達人之義舉捐設義學詳其條規豐其館穀散請明師宏獎後進由是而富者能學貧者亦能學名都大邑者能學窮鄉僻壤者亦知學而凡明夫道者不皆學中人哉事旣竣董事沈君念

南金君秀山曾君省齋來囑余言余思家塾黨庠
古今之成法備矣器識文章古今論學之旨歸審
矣尚奚以余言爲乎惟是諸君子不憚積日累月
之勞以成發聾振聵之美其別學之名曰義其溥
學之惠則仁也人不可一日無仁義之心即不可
一日廢仁義之舉所冀今之諸君子始終以義行
仁毋或稍替是又余司鐸者之所當言而分不容
辭者也因爰筆爲之叙

三里分設登庸會小序

邑副徐瑜

粵稽新邑古號淙城寶泉映月珠峽霏煙郭外之
中山毓秀城西之鳳嶺鍾奇所以歷代杰士挺生
科甲競盛也迨至

國朝春秋兩闈稍爲減色非關生才之不偶實由赴選
之無資雖花生筆底足標俊乂之才而金盡床頭
每短英雄之氣辛丁酉秋陳君小坡作宰斯邑志
培學校會集登庸勸富室之解囊濟寒畯之涸轍
構置田庄以立根本歲收租息以助賓興令遊京

新甯縣志

卷八

藝文序

二十

華者遠而不遠行蜀道者難而非難誠一時之惠
政亦千秋之義舉也計前之倡其始者有黃公七
菴後之成其終者有徐君松坪而吾境張君鶴齡
等同襄厥事因熟爲籌謀以附郭置田雖足昭其
體統隔途領贖正不便於士林爰集三甲別捐會
貲置田廿餘畝獲租七十餘石管事者便於經營
分領者無勞跋涉佻看健鶻凌風扶搖九霄之上
巨魚得水縱橫四海之中矣是爲序

啟

勸捐登庸會啟

邑令陳廷揚小坡

蓋聞三年大比宏開籲俊之規萬國同文俱切觀
光之志儒者必窮經以致用

朝廷常東帛以求賢始則論秀東膠青衿漸染繼則蜚
聲

北闕白紵爭拋折桂才高秋展蟾宮之步占榴喜兆春
題雁塔之名建赫奕之功勲

楓宸賜慶寫風流之姓字梓里增光然而謁選維殷懷
新甯縣志

卷八

藝文啟

資必裕雖是花生筆底每多金盡牀頭鸚薦初膺
路赴青雲之遠蚨飛不返家慙白屋之寒此所以
灰俊乂之心而間觀壁上短英雄之氣而久處囊
中也本署縣釋褐於朝鳴琴此地雖城荒市冷境
若藐乎彈丸而水秀山青靈亦分平井絡寶泉映
月珠峽霏烟飛鳳翥於雲中卧牛盤於郭外山橫
誥軸祥開富貴之基井汲芙蓉瑞啟科名之兆地
靈既聚人傑宜鍾而乃遠溯勝朝雋春闈者六子

近稽

昭代膺鄉薦者五人雖非寂寂無聞未克多多益善
夫豈生才之偶乏半由赴考之無資筆未投班欲
掃千人之陣囊常澀阮難春百里之糧不但郭隗
登臺居長安者不易亦且嚴遵賣卜行蜀道者真
難所願諸君子故里情深儒林望切貧憐措大會
集登庸以慷慨之心篤栽培之意因遠行而餽贐
與不傷惠而取不傷廉量力以通財少之為貴而
多之為美山塵不讓木可得其成林河潤能方魚
豈憂其涸轍似東風之可借遇美鴻毛庶大道之

新甯縣志

卷八

藝文啟

二

能行兆看驥足虧於已者甚少濟於人者實多澤
延夫禮樂詩書無難上達恩邀於鄉黨隣里不待
他求路踏黃槐送匆忙之舉子春尋紫陌看塗抹
之郎君乏赤仄於當年秋江自怨增青錢於此日
天路同升文運方新勛菁莪之雅化善緣曾結開
桃李之新華謹叙數言同襄盛舉是為啟

疏

勸捐登庸會疏

邑令錢召棠字蘅儂

聖天子握鏡延洪甄符集貺振宣風之鐸有感皆通揚建善之旌無思不服四門啟牖六律翕和璫璣咸貢於

王朝杞梓備榮於文圃山無抱璞淵少沉珠值

壽宇之宏開更

恩綸之叠沛六十載無疆之福遐不作人億萬年有道之華永言維則春闈預啟慶叶庚符秋榜先開祥

新甯縣志

卷八

藝文疏

一

徵亥字峩峩髦士濟濟英贇孰不思揚辟靡鐘鼓之休際朝野風雲之會者哉新邑天臨翼軫地屬岩渠桃李三春不少橫經之士桑麻百里無非翹楚之材峽號連珠光能照乘峰高卓筆氣可挾天夫其藉山水之清靈有以壯文章之光燄也然而環山阻水越嶺浮江車無竒肱之飛舟少螺人之至望長安於日下路近八千問錦水於江濱程須半月長途躑躅岐路赳赳不免周道興杖杜之嗟下車有芣苢之嘆矣而况貧原為土寒乃稱儒春

無隔宿之糧若則易衣而出華門圭竇雖能自守
青氈月窟風簷要亦難言白戰當其杏花紅處桂
子香時租就疲驅賦成窮鳥責田文之券典季子
之裘石田且讓人耕鴻廡何妨客賃庶幾背城而
一戰遑計懸布而再登乃得志者固自欣然失意
者猶然康了強臺未上安能燕市金來弱水空廻
誰放孝廉船去曹騰春夢瓊瑰秋風空有羨魚結
網之心遂成壯羝觸藩之象做繻可棄原思吐氣
於青雲故緝空鑽豈竟甘心於白首作唐衢之慟

新甯縣志

卷八

藝文疏

二

哭爲此方兄撫趙壹之空囊莫呼將伯非文章之
誤我實境遇之困人也前陳小坡令尹太邱道廣
早騰薦士之書今徐松坪廣文孺子風高屢下延
賓之榻志存萬厦念切三冬爰集同心遂成創舉
此我新邑登庸會之所自起也邑紳士關心芹藻
維敬梓桑王彥方之持躬一鄉領袖鄭裨諶之謀
野比戶傳箋都人士從善如登當仁不讓黃流赤
仄悉歸多寶船中讓水廉泉盡入居仁邨裏考昇
天之功行數滿三千閱彈指之光陰時惟一月炊

梁可熟點石能成固已易若撥蠶疾如偃草困有
魯公之粟田營陸氏之莊仁有待乎南扶可無虞
其西笑矣惟是千尋之木必揭其標萬里之流宜
窮其委事固期其因基積厚人亦貴乎原始要終
狐裘非一腋所成良金必九冶乃耀今則觀叔生
之綿蕞畧其規模而仰夫子之宮牆未臻美備本
縣才安拙宦進自他途製駕錦之未能割牛刀其
焉用從事簿書堆裏驚心古戰場邊檢舊日之青
衫尚有盈襟之淚對今朝之黃菊依然放榜之天

新甯縣志

卷八

藝文疏

三

慣嘗此味辛酸備識是中甘苦用陳梗概請事續
貂聽我芻蕘先爲嚆矢伏願邑中讀書長者知禮
士人多田足穀之翁洗腆牽車之侶借衆擎之易
舉加一簣而非難功等積薪行同采菽壯英雄之
氣色結歡喜之因緣合成宰士之金永享陀移之
福從此身登科第固知文字之有靈即其志在田
園亦見兒孫之食報聖人道大共上春臺君子澤
長咸遊壽域將見吉貞金石同垂不朽之名密葉
交花預識登科之記

引

募集文昌社小引

黃位斗

昔人祀文昌六星而尚無專祠自蜀有梓潼神君廟而祀文昌者遂以屬之然亦初無帝號也唐鄉貢進士孫樵有祭梓潼神君文非其證歟按神張姓其先越舊人爲母報仇徙居劍州七曲山什晉戰沒是其忠孝大節炳若日星卽以文昌當之亦烏乎不可故雖宣科說讚頌帝稱君皆出於道士之書而其陰騭下民靈蹟之著如日月常昭夫是

新甯縣志

卷八

藝文小引

故無人不祀亦無地不祠也

本朝嘉慶初年值白蓮教匪之亂主兵者失計致賊渡嘉陵蔓延川北及梓潼而懾於神威省垣始解嚴乃上其事於

朝廷於是崇封號正祀典春秋祭享一如關廟儀神之爲靈益昭昭矣新邑建廟之初其制度甚卑陋道光六年復募資移建並號舍於中以校童子試規模宏敞煥然改觀每朔望瞻拜肅然起敬之餘未嘗不默頌神之靈而嘉邑人士之勇於趨公也惟

聖廟方改作於前已逾萬金之費繼修帝君廟又
不下數千故落成而計無餘貲雖不必繼長增高
踵事增華而補葺之經費宜未雨而綢繆前改作
夫子廟及繼修帝君廟時先後知縣事者關中謝
公玉珩滇西吳公協實董其成余不獲勳事於始
竊願與諸君圖終蓋治民事神固守土之責亦學
者之事也昔蘧伯玉恥獨爲君子矧邑人士素好
義而弗與之公向善之心乎余於新進諸君子有
厚望焉用是協同寅僚薄捐清俸以爲諸君子倡
其量力捐輸毋較豐約期於積腋成裘且自是卽
以爲常每試新進者皆捐輸視此從茲權子權母
有不愈積愈豐者哉夫泰山不讓土壤故能成其
大河海不擇細流故能就其深然則銖銖之積累
雖始計不足固終計有餘矣他日賓興之典禮北
上之資斧何不可取給於是卽謂與新進諸君子
代權子母也可是爲叙

題辭

讀槐村老人屏山子傳題辭

賈位斗

壬辰冬余奉檄宰斯邑越明年議修邑志訪邑中高人軼事適宏盛劉君以其家乘進因得悉所謂槐村老人與屏山子者余惟有功不伐自古爲難方白蓮搆亂邑人皆鳥獸散而槐村與屏山父子赫然義憤誓必滅此而後朝食乃傾囊募勇士分道抗敵紅巖一戰指陳方略誘羣醜聚而殲旃自是人心始定諸匪不敢復窺新邑者數年當是時

新甯縣志

卷八

藝文題辭

一

執戈之士皆效血戰以自立功名而槐村父子獨漠然無介於意不膺一賞不受一官迨至偃伯靈臺戶皆安堵遂相繼而終老家山睦族比鄰不形德色視世之不務令德而求令名者其爲人賢不肖何如也夫以喬梓之不務名若此而傳之者顧連篇累牘嘖嘖稱道不衰若使其九原可作未必不惡此而逃之然諸公以學士而表高賢宏盛以後嗣而揚先德要皆出自秉彝之好天性之誠而倦倦不能自己者况余有守土之責顧以世濟之

幽光而隱而不發可乎哉爰撮其崖略以光邑志
并跋其後愆息宏盛別付剞劂異日者輜軒下採
登

國史以式民風是又邦家之光而非僅里閭之榮也

新甯縣志

卷八

藝文題辭

誌

邑婦曠張氏殉節墓誌

邑今元象乾字始舉人

壬戌春新甯失守越二月予蒞任聞婦女死節最慘詢諸父老誠然問有處置盡善不留遺恨者歟僉曰東關某婦並弟婦某氏可風焉詢其詳曰孀姑在堂聞賊至先命子姪輩負以遠避奉母命佐夫理公不使有內顧憂城陷率弟婦等仰藥死賊義之厚殯焉予曰先為姑計孝也佐夫不去義也臨難不苟節也新邑蕞爾區巾幗中得此二人亦

新甯縣志

卷八

藝文誌

一

足以光千古矣其婦為誰一則布理問銜曠君迪人之妻唐安人一則增廣生負曠君經五之妻張孺人予官斯土詳請

旌表適墓成特誌之以俟採風者

議

堅壁清野議

並序

蘭州龍景瀚
知府

龔景瀚字惟廣一字海峯福建閩縣人乾隆辛卯科進士歷官至甘肅蘭州府知府嘉慶二年總督總統宜綿率同入川參謀軍事久歷行間諳悉形勢著堅壁清野議撫議總統是其策移咨陝楚各大帥繕摺將入奏矣適爲旁議所阻不果行有識者惜之越數年殲滅教匪卒如其言

其議云竊惟邪匪滋事以來蔓延四省輾轉兩年

新甯縣志

卷八

藝文議

處處有賊處處需兵負固則經年累月不能克奔竄則過都歷郡不能禦議者惟以兵少爲辭於是調隣省增新兵募鄉勇但謂以多爲貴不知其無益而反有害也何則

國朝經制之兵本屬有限而腹裡尤少其重兵所在非番回錯雜之區則形勢要害之地也一調不已而至再再調不已而至三備禦空虛奸民因而肆志是無事之區又將滋事卽如四川湖北之兵皆以全赴苗疆邪教遂乘機起事豈非明效大驗乎

此調兵之害也倉卒募兵但取充數非市井無賴之人卽窮苦無聊之輩紀律不習技藝不精心志不齊膽氣不壯遇賊惟有烏獸散耳此增兵之害也鄉勇守護鄉里易得其力若以從征則非所願無室家妻子田廬墳墓之足繫其心也平居未受涓埃之恩臨難責以身命之報於事旣有所難能而爲之長者素昔等夷本無上下之分與以虛名強相鈐制於心又有所不服故加恩則玩而驕執法則忿而散求其約束而整齊之者難矣其藉此

爲利浮開名數冒領銀糧者又無論也至於臨陣旣未習乎戰鬪疑則易驚又各自爲步趨紛則易亂卽或誘之以重利鼓之以大義而有勇無剛能暫而不能久闕然而進亦闕然而退耳此鄉勇之害也且兵勇多則糧餉廣糧餉廣則運轉難

國家帑藏充盈殺賊安民雖千萬在所不計而民間之疲於輓輸困於差徭者不知凡幾矣文報有站糧運有臺軍營之移徙使節之往來其夫馬不能不資於民力近地不足調之遠處州縣雖官爲給

價值而例案所銷豈能敷用每縣夫數百名馬數百匹道途之費守候之費津站之費司事者口食之費皆派之里下不肖生監又從而乾沒其中爲日旣久民力竭矣官吏但顧考成一切以軍興法從事科歛督責民必不堪事變滋起或遇水旱之變將何以處之况夫將領不能約束兵丁所過甚於盜賊鄉勇從而效尤激而生變是所憂者不獨在邪匪也然使有濟於事僥倖成萬一之功亦不必過爲疑慮而自去年以來其情形大概可見矣

新甯縣志

卷八

藝文議

三

四省之山層崖峭壁四面削立如城寨者所在多有其上有田有水賊若據之非數萬之衆不能攻取然周圍百餘里或數十里終未能環而圍之也竭力仰攻士卒損傷過半幸而得之賊已乘間率衆他徙矣則又窮日夜之力以追之而其勢常不相及蓋賊因糧於民無地非民則無地非糧官兵之糧必須轉運賊竄無定向亦無定期糧臺豈能預設夫馬豈能預增倉卒移營糧必貽悞此一難也賊皆輕身登降便捷而我兵烏鎗弓箭火藥鉛

彈身所佩帶不下二三十觔行走不易此二難也
賊皆本地之人慣於山行婦人孺子亦趨捷若飛
而我兵如陝甘等處壯健有餘輕捷不足登山半
日汗流氣喘未遇賊而先困矣此三難也賊隨時
隨地可以休息而我兵行必按隊止必安營挖壕
柵柵守卡站墻日夜不得安歇此四難也賊常飽
而我兵常饑賊常逸而我兵常勞勝負之勢已分
矣幸而勝之所殺者賊之後隊數十百人或其老
弱疾病不能行者耳其首逆及全夥不可見也賊

新甯縣志

卷八

藝文議

四

之詭計又分布數人於左右十餘里中四面放火
使我兵疑畏不敢遽進及至探明而賊踪已遠矣
此尾追所以常不及也於是有謂宜繞道前進迎
頭截殺者究之亦係空言無實濟也前後夾擊則
左右分馳東西並攻則南北各竄山澗重叠道路
紛岐處處可通頭頭是道安所得十餘萬之兵分
布於數百里之內其勢既分其力亦薄賊以全力
舍命衝突亦未有不潰而出者故賊之往來可以
自如我之進退反不能自主賊合而我兵不得不

分賊分而我兵遂不能復合焚掠裹脅賊愈殺而愈多疾病死亡兵日添而日少勦則無以爲守守則無以爲剿城池已存在堪虞將領惟斤斤自保今日之賊無論非今日之兵所能蕝事卽或額兵全來新兵已練而使之追逐千里之餘奔馳半月之久力疲氣阻其勢又爲今兵之續賊勢益張兵氣益餒日延一日事恐不可問矣然則爲今之計將奈何曰賊未至巴州而巴州之民先去賊未至儀隴而儀隴之城已空守土之官雖欲效死勿去

其誰與守此無他民心無所恃也故殺賊以安民也今必先安民然後能殺賊民志固則賊勢衰使之無所裹脅多一民卽少一賊矣民居奠則賊勢絕使之無所擄掠民存一日之糧卽賊少一日之食矣爲今之計必行堅壁清野之法責成地方官巡行鄉邑曉諭居民團練壯丁建立堡寨使百姓自相保聚併小村入大村移平處就險處深溝高壘積穀繕兵移百姓所有積聚實於其中賊未至則力農貿易各安其生賊旣至則閉柵登陴相與

爲守民有所恃而無恐自不至於逃亡別選精銳之兵二三千名以牽制賊勢不與爭鋒但尾其後賊攻則救賊退則追使之進不得戰退無所食不過旬餘非潰卽死耳不戰而屈人策之上者也其要必先擇良吏一省之中賢而能者道府豈無數人牧令豈無二十餘人其奔走趨事明白勤幹者佐貳豈無數十人今川省賊所往來者川東惟夔州一府達州一州川北惟保甯順慶二府而已陝西惟興安一府商州一州河南惟南陽一府湖北

惟荊州宜昌施南襄陽鄖陽五府而已所屬牧令賢者留之不肖者易之每處各派佐雜數人分任其事以一道府董局事佐以正佐數員講明利弊議定章程總其大綱其餘道府分路經理稽查不過三月可以畢事矣其次則相度形勢天成之險如大成寨太平寨等處者加卑因高使之可守移附近居民於其中先藏積穀貧者官貸其資茅屋草棚聽其自便其故居仍留勿毀賊未至時仍可照常安業也其村庄市鎮人烟湊集如臨江市普

安場等處者隨其所居因山臨水爲築城堡外挖深壕務令高廣民零星在外者移入之磚石木料匠役之費皆給於官惟丁夫取於民有貧乏者量給口糧以代賑恤其次則選擇頭人山上之寨平地之堡人戶旣多一切事宜需人經理擇其身家殷實品行端方明白曉事者或紳監或者民舉爲寨長堡長給以頂戴予以鈐記使總一寨一堡之事其清查戶口董視工程經管銀糧稽查出入訓練丁壯脩飭守備別擇數人爲之副各就所長分

任其事以專責成其次則清查保甲戶口繁多奸良莫辨外至者虞其爲間諜也卽久居者亦慮其有匪黨也行保甲之法十家聯保互出甘結始准移居匪類送官究治其踪跡可疑尙無確據者另附冊尾聽其另居自便毋使溷人以滋後累其餘良民悉使團聚家有幾人大小幾口所搯何業田地若干詳註冊內以備稽查其次則訓練壯丁每戶抽壯丁一人或二三人編爲部伍烏鎗刀矛斧習一技官爲給價製備器械每一堡寨擇營中千

把或外委一員兵三四名使之教導勤加訓練有事則登陴守禦自保鄉里毋令出征惟本州縣有警或隣堡告急許以其半救援其次則積貯糧穀堡寨之中建倉數間富家固戶有糧難以盡移者官給銀悉行收買入倉無者買於隣近各鄉官兵經過卽以此糧供支賊至閉寨壯丁守陴按名給糧毋令家食其鰥寡孤獨貧乏殘疾及家稍充而實無糧者准其照冊分別賑借賊平之後卽爲本鄉社倉分貯常平一遇災歉亦可就近賑糶其次

則籌度經費所有築堡挖壕建倉買糧置備軍械一切守禦器具及搭棚蓋屋之費銀皆官給交堡寨長司其出入惟倉糧之數至於官賑借供支官爲報銷其餘糧勻攤於堡寨居民所有田地分爲十年或八年隨地徵還如此者有十利焉川省無上著之民五方襍處其性輕於去就故一聞警報輒四散奔逃民心疑懼則千里無堅城矣今堡寨林立聲勢聯絡民居旣安民志自定父母妻子一家團聚無流離死亡之憂並不慮爲賊逼脅隕於

邪黨可以保全良民潛消賊勢其利一也糧皆藏於堡寨所餘村落舖店皆空屋耳賊卽千里焚掠無所得食若攻圍堡寨則丁壯自護身家其守必力又有隣堡之救援官兵之策應其勢必不能攻陷狂奔十日非潰而四散則輾轉於溝壑之內而已區區首惡何難就擒可以制奔竄之賊其利二也據險之賊不能不下山掠食今民皆團聚糧不露處冬春之郊野無青草附近已無所掠遠出則近山之堡寨皆得邀而擊之其勢又不敢出坐困

新甯縣志

卷八

藝文議

九

月餘積糧旣竭終亦歸於死亡逃散而已可以制負固之賊其利三也州縣之鄉村如樹之有枝葉若枝葉傷則根本無所庇鄉村皆爲賊所蹂躪其城郭之不去者僅矣今四面皆有寨堡障蔽擁護賊必不敢徑犯城郭有急則環而救之如手足之捍頭目賊將腹背受敵况官兵又乘其後乎可以保障州縣其利四也堡寨遠者相距數十里近者或十餘里官兵經過就近供支糧臺可以不設官無轉運之費民無輓輸之勞至文報往來尤闕緊

要堡寨之在大路者卽安設夫馬遞送無須兵勇
護之可以省臺站之費其利五也每省挑選精兵
三千賊合亦合賊分亦分牽制其後使之不得攻
陷城堡足矣其餘悉令歸伍所省鹽糧猶其小者
也兵省則差徭亦省民受無窮之利而營伍不至
空虛亦無慮再生他變其利六也守陴壯丁惟賊
至時數日給以口糧耳無按月之鹽糧無安家之
銀兩也其費較招募鄉勇所省何啻天淵而愛護
鄉里朝夕相見猶有古者守望相助之意可以情

法維繫之不若鄉勇從征日以習於寇暴却公戰
而喜殺掠釀爲將來無窮之憂其利七也保伍時
相糾察而堡寨之長又從而稽查之則奸宄無所
容其桀驁不馴如咽嚕者亦攝而不敢肆可以漸
化爲良民其利八也邪教蔓延爲日旣久伏而未
動者正不乏人今淑慝旣分居不相雜其冥頑者
苟潛入於賊中可以一併殲除其愧悔者必安居
乎故業可以保全身命絕後患之萌開自新之路
其利九也規模旣定守而勿失遠近一體上下同

心如網之在綱有條不紊如身之使臂無令不從無事之時按籍而稽瞭如也有事之時畫地而守井如也一勞永逸數世賴之其利十也然而愚民可與樂成難以慮始因循日久畏難苟安此議一出必有沮之者矣一則曰騷擾反以累民也夫擇利莫若重擇害莫若輕賊匪所過焚燒房屋殺戮人民擄掠婦女其慘極矣民雖至愚亦必明於利害所全者大卽小有騷擾猶當毅然爲之况保其身家全其積聚順其情之所樂何累之有若云奉

新甯縣志

卷八

藝文議

七

行不善則官吏之過當易其人不當廢此法如戰場失利豈以偶無良將而遂永不用兵乎一則曰迂緩不切於事也夫欲速則不達自去歲以來所行者何一不速何一有效事固有不急於目前而收功於異日者及今爲之未爲晚也行之一縣可保一縣行之一府可保一府同時並舉不過三月賊在網羅之內矣是速莫速於此也舍此以圖其果有旦夕奏效操券而得之策乎一則慮其費大也夫成大事者不惜小費苟能平賊卽多費亦所

不惜今州縣大者不過堡寨數十處小者十餘處
一省所辦不過三四十州縣耳哀多益寡合計每
省不過用銀一百萬兩而已自是卽無所費較之
養兵養鄉勇每日需銀百萬者其費何如且尙未
有底止也惟買糧爲費較鉅而糧分貯於堡寨何
異貯於州縣之倉今各州縣豈能不採買乎其餘
借項分年帶徵歸款是不獨省費且並無所費矣
一則畏其繁難也夫天下無難成之事患無任事
之人今自道府下至堡寨之長總理者有人分任

者有人勞瘁不辭纖悉具舉何慮其繁難且通江
巴州儀隴賊所蹂躪之處失業難民豈能不爲撫
卹清查戶口修理房屋弔生恤死賑乏周貧其繁
難何止十倍於此與其補救於已然之後何如豫
備於未事之先願平心而熟計之也是數說者皆
不足以難之然則今日之急計莫有先於此者矣
安民卽所以殺賊民懼賊而逃猶可言也兵愈增
則差徭愈重師愈久則擾累亦多數月之後恐民
之見賊將不逃而合之矣今不早爲後悔無及謹

陳一得之愚伏惟垂採幸甚

新甯縣志

卷八

藝文議

十三

撫議

龔景瀚

賊不可撫也其勢亦不受撫所謂撫者撫百姓之從賊者耳今百姓之從賊者大率有二一則被其煽惑者一則被其裹脅者被其煽惑者皆甘心於從賊者也然其中有辨入教既以心性俱迷信其矯誣之詞妄作非分之想不懼不悔視死如歸此冥頑不靈非可以情理化導者也又有富者畏禍貧者貪利邪教以避災得財之說歆而中之一時不察翕然信從然素無不軌之志也一朝事起官

新甯縣志

卷八

藝文議

十四

府訪查隣里執証既無詞可辨遂無地自容鄉勇利其田宅家產以多殺爲功一言在教婦孺駢誅其存者不得不棲身賊巢以爲苟延性命之計此愚民誤入其教而不能自脫者也被其裹脅者皆不得已而從賊者也然其中亦有辨精壯之民賊先拘係以苦之旬日之後強以拜師令其入教縛老弱逼其手刃分隊放火押令隨行與官兵相遇授以戈矛驅迫前進倉卒打仗百姓既不及自明官兵亦無從辨識鋒刃交加既欲貪已之生不

得不致人於死而放火殺人之罪遂無所逃賊乃縱之往來自如而百姓已無生還之望矣此欲歸而不敢者也老弱之民或令煮飯或令放馬或令挑擔什物不給以糧自行覓食隨時搶掠餬口饑飽無常其苦萬狀日夜思歸然妻子爲質則中心戀戀不忍遽離家業已殘則後事茫茫無可措置不得不隱忍隨行以圖苟活卽有子身易於逃脫而賊之防範甚嚴晝則維以大索纒纒相繼如驅牛羊夜則閉之空房陣陣相積如圈豚犬蓋有十

餘賊而制百十人之死命俯首帖耳莫能先動者矣此欲歸而不能者也自嘉慶元年用兵以來吾民之死於賊者無論已官兵迎頭殺擊其衝鋒冒刃者皆吾精壯之民也官兵從後尾追則兜擒掩取者皆吾老弱之民也其死者不知凡幾矣幸而乘間得出守卡之勇坐營之兵盤而獲之以爲奇貨文致其罪冀邀厚賞非法考掠多方指証草草數言卽行正法其死者又不知凡幾矣幸而解赴大營委官審訊而從賊日从放火殺人則罪在不

赦問官惟守此兩語以爲盡職黠者狡詞變易則死於刑愿者據實自陳又死於法其幸生者皆歷幾死而後得之什伯中僅一二也夫律坐喝令卽下手亦從未減何況被賊所逼事不由已而徒泥其迹不原其情風聲所布孰敢復出使賊益得藉口以鈐制吾民此從賊之心所以愈堅而賊之所以日多也今蒙

皇上施浩蕩之恩

開三面之網蕩滌舊染與之更新伏讀

新甯縣志

卷八

藝文議

六

聖諭自古惟聞用兵於敵國不聞用兵於吾民自相攻擊屠戮生靈朕日夜哀憐幾至寢食俱廢百姓極困思安夙勞思逸諒必一見

聖旨翕然來歸欽此捧誦迴環無不感激泣下卽此數語已足以感

天地之和而消邪沴之氣矣賊亦人也其有心腹腎腸亦當感動悔過何況被脅之良民哉惟是愚民目不識書謄黃遍貼賊中防守甚嚴一時未必周知卽知亦或未敢深信諭以空言不如示以實事之

爲深切著明也伏求

勅諭各路領兵大臣於大營中豫備大旗一面上書招無難民四大字遇賊打仗以兵數百人守之另立於山之上或營之左右距營一半里許其有投棄器械來奔旗下者悉不得殺賊方迎敵官兵不暇兼顧裹脇之民必相率歸來矣嚴飭守卡員弁兵勇自賊營逃出或被盤獲者無論是賊是民曾否放火殺人均不得擅殺送交地方官問其姓氏里居願留者妥爲安插歸籍者酌量資送風聲傳布

新甯縣志

卷八

藝文議

十七

孰不求生卽或所放之人未必無一二真賊逃回賊營然賊旣生還則百姓更無死理在賊營之百姓無所疑慮益堅其向化之心乘間歸者紛紛恐後矣此解散之一法也其有心地明白語言便捷者予以重賞令其招徠招出十人者給以十人之賞招出百人者給以百人之賞能殺賊縛賊來獻者更加優賚如係賊之小頭目更爲得力唐李愬之平淮蔡宋岳飛之平楊么皆重用降將轉相鈞致賊心旣散賊黨自離卽使一人不返不過失一

真賊於事無闕輕重若使一人成功則保全無數
生靈於

國家實有裨益此解散之又一法也抑某更有請者
教匪及咽喉等執迷不悟非重懲之以威不能遽
懷之以德而被脅百姓受制於賊亦有欲歸不能
之勢某三載軍營所見百姓逃回者皆在官兵打
仗之日官兵大勝則逃回者甚多官兵小勝則逃
回者亦少是勦而後可以成撫而勦必須兵力今
兵力少惰矣仍宜添派精兵慎擇良將勦撫並用

新甯縣志

卷八

藝文議

十八

竒正相生兼行堅壁清野之法百姓自相保聚使
賊無人可裹無糧可掠旬日之間不特被裹百姓
投出相繼卽真賊亦鳥獸散矣有鄖陽之白圭項
忠先後擒斬劉千斤苗龍等數萬人而後原杰得
以成撫治之功書云威克厥愛允濟非忍於用威
乃所以成其愛也至各省情形微有不同教匪四
川爲多其裹脇川民亦衆今首逆陸續就誅賊勢
漸形瓦解一加招撫來者必多是四川利用撫陝
西習教者安嶺將軍山諸役殲戮殆盡逃入川境

者不過一千餘人兩年以來川楚逆匪往來興漢
商一帶沿途裹脇皆隨裹隨逃故賊中陝民頗少
無可招撫是陝西利用勦至湖廣受鄉勇之利亦
受鄉勇之害殺戮過甚勢不相容不特楚賊不敢
回楚卽楚民亦不敢回無所用其勦亦未易言撫
其來歸者量爲遷移方可相安無事是又在地方
大吏之隨時變通矣謹議

箴

四維箴其一曰禮

竇容邃

禮從天制秩叙森然嘉會之合敬恭無愆晨昏子
舍咫尺天顏夫倡婦隨弟後兄先他山攻錯德性
彌堅分主嚴明用以和宣君子循之威儀翩翩小
人蹈之誠慤綿綿出入是門矩方規圓相鼠免刺
醇風可還

其二曰義

義爲事宜心制其精參差萬類量度權衡辭受取

新甯縣志

卷八

藝文箴

一

予患難死生千駟何重一介何輕貧賤何辱富貴
何榮士尚質直好義而行農安本業讓畔而耕商
賈服此利市克盈守以集務準以平情險夷一節
和順乃成

其三曰廉

廉自清心心清潔操義利分關差在釐毫取當其
可萬鍾鴻毛受非所宜一介貪饕甯露圭角毋染
脂膏甯礙人眼毋哺其糟身非溝壑志鄙艾蒿首
陽峻節柳下賢豪摸稜兩端罄折徒勞分辨旣嚴

用戒汝曹

其四曰恥

恥涵在中羞惡之良擴充作聖銷滅斯狂不恥不
仁人心以亡不恥不義利賊欲戕辭讓罔虧是非
允臧呼蹴弗受奚願膏梁鶉結可衣奚藉繡裳陋
巷足樂奚俟雕牆窮見節義達植綱常懷守勿失
四維孔張

新甯縣志

卷八

藝文錄

二

賦

荷錢賦

以點溪荷葉
疊青錢為韻

成都舉人周紹鑾敬輿

署後省耕亭畔有池方丈舊種芰荷時逢孟夏
浮葉如錢遊目騁懷頗得泛綠依紅之樂故賦
之

麥浪青鋪桑田翠潏憶蒲月兮將臨浮絮泥而不
染鎔成紫貝槐火痕銷漾出青蚨柳橋指點流水
東西長堤短堤蠅頭掩映鵝眼離迷堪擬於五銖
半兩何分乎淺港深溪雨過鏡銅磨香風盪不波

新甯縣志

卷八

藝文賦

天工勤橐鑪鑄遍古池荷盈盈熨貼圓規適協泉
不廉名河堪利涉朱提則綺襯霞烘白打綠珠跳
露裊千枚字印細落萍花一串緡拖曲穿荇葉榆
錢兮形殊苔錢兮勢接懸來竹杖撿倩鮫人貯處
蕉囊數憑魚妾訝龍文欲化兩兩三三疑馬飲初
投重重疊疊爰為歌曰歷亂復零星年年散小汀
勸君收拾盡萬選惜浮青又歌曰西湖富貴本天
然十貫何須子母權買得採花人一笑蓮房費卻
許多錢

詩

奉答香樹錢通政青立宋考功以詩見寄步原韻

率成

竇容邃

謁選入承明樸邀留真面相期在千秋汲古廢墟
扇脂韋鬪茸耳虺蜴媿生汗作吏逾三載拊循事
未半猥囂禮義薄悚惕廉恥現白岩插青霄宕渠
穿幽澗石室杳難追銅章危如棧招徠近百年恬
熙仰

帝眷三月春色深履標郊原盼萬里一勞人考績寡所

新甯縣志

卷八

藝文詩

見悵懷望知己石棧峯烟斷何日邀舊遊曲江重
開讌

壬午春正九日新建大成殿樹楹率僚屬紳耆拜
樑而龍獅燈適至詩以誌喜

邑令安謝玉珩字鶴
康進士齡

歡樂經營不日成奎光昨夜照淙城魚龍戲是登
科兆竚看鵬搏萬里程

寄語羣英早着鞭鷄鳴起舞要爭先功名本是囊
中物莫把根由盡附天

題劉槐村暨屏山子傳

吳協

凡毛焉得比鳳羽
凡蹄焉得比麟趾
天生奇異世所希
卓哉槐村屏山子
槐村系出古彭城
代有英多磊落人是翁
矍鑠尤尚義血性一腔率其真
屏山子兮克養志
少年入塾旋入肆
廢箸能致家道豐
排難解紛等閒事
柔兆執徐起妖氛
宵方嘯聚晨警聞
兩川東北蔓秦楚
星麾露布疲官軍
官軍分勦缺徵調
義勇男兒相呼召
紅巖疑陣摧賊鋒
敵衆我寡方略妙
小醜去來民心驚
自衛鄉閭結

新甯縣志

卷八

藝文詩

二

團營紙糊新甯難打破
仗此衆志成堅城
凱章屢奏義旅捷
死旌生賞名臚列
惟公父子行皦然
長揖千金謝勲牋
我來淙邑久承平
閭閻買犢勤春耕
訪公父子已黃土
仁麟威鳳垂芳名
麟之仁不蹴生草
鳳之威不猶凡鳥
如公父子那能多
如公父子安可少

贈邑侯七菴黃明府卽頌華誕

邑優貢生

孫代芳

字薊圃

吉座剛懸一鏡明
又看天上燦長庚
閭閻好獻岡陵頌
名杜無慚父母名
穎郡當年留治譜
淙城此

日著循聲稱觴進效南山祝躋彼公堂酌兕觥

壽星光與福星同仙吏飛鳧自閩中來暮正歌懷

豈弟無疆致祝慶衡嵩論年竊喜方強仕蒞政先

能秉至公叔度汪洋人共仰何期下里接高風

暗香浮處列瓊筵玉照堂前壽謫仙品與梅花同

上格稱觴時梅心如止水鑑廉泉生申慶篤懸弧

日登甲聲馳奪錦年但祝仁人勤撫字從來造福

仗青天

借寇真能得使君棠陰苒苒覆卿雲鴻才忙懋巴

新甯縣志卷八

藝文詩

三

東治藻鑑先空冀北羣下車觀風邑武宰絃歌蒙

作育文翁雅化繼殷勤俚詞謬製申三祝郢可還

勞大匠斤

輓桂壯勇公七律四首

孫代芳

公諱涵字養齋東鄉縣人由義勇起家歷官至

本省軍門年七十猶健進征猺夷卒於軍全川

震悼訃

聞

贈太子少保

謚壯勇遣官致祭護其喪歸故里誠

異數也公之功在社稷保全地方者不少獨達兵之變

新甯受賜尤深故附輓詞於邑乘以示不忘之

意云後之覽者即以此為峴山碑也可

天生元老作長城保障端資義旅營酣戰十年熾

巨寇教匪之亂揚威萬里怖先聲征果洛克往還

偏裨那不傾肝胆婦孺都能識姓名倚重方殷身

遽殞全川洒淚濕雙旌

瘴雨蠻烟聽鼓鼙大星一旦墮清溪尅期並掃狼

新甯縣志

卷八

執云文詩

四

氛淨落月驚聞杜宇啼遂志原憑三尺劍成功尚

待一丸泥沒於王事復何恨馬革還尸漫並題

果是沙場又善終蓋棺今日定英雄鄉邦秉鉞膺

專闡册府銘勲爵上公壽考神明原矍鑠老成智

慮竭精忠垂危時無一語及家事捷書剛遞馳凶

聞盡瘁無慚殫厥躬

勇而儒雅近

龍光

天語褒崇寵異常

道光八年

陞見

上謂軍機

人臣有桂涵勇而儒雅之譽

謀畧不殊班定遠 勲名直比郭汾陽 彤廷賜卹

君恩重 奕葉蒙庥世澤長 上諭凡諸子成立者俟 服闋引 見加恩

獨愧駑駘為羊子 青雲有路未騰驤 公芳之外舅 故知之更悉

壬辰冬赴涇城任在大竹旅館作 黃位斗

蜀道難行自昔聞 臨晨旅跡各紛紛 馬蹄踏碎山

關 月容袖揮開嶺上雲 第把初心來保赤 欲扶大

雅去觀文迂踈莫 謂親民易清慎 常持更勵勤

歲臘署中大雪

誰把晶鹽信手揮 田來簷下雪霏霏 半空玉屑隨

新甯縣志 卷八 藝文詩 五

風散六出銀花帶 雨飛鴻踏濕泥雙爪印 鴉投深

樹一枝 依天公顯 示豐盈 兆惠澤 先滋宿麥肥

乙未季夏久旱設壇祈禱喜得大雨

經旬祈禱望雲虔 雷電交催雨沛然 新漲一溪魚

鼈活平疇萬頃黍 苗鮮涼添宰室心如水 潤洽農

家興欲仙偶聽康衢歌 既渥薰風拂處奏虞絃

夜宿廣鎮偶吟 邑令康鴻訓 仲穆

忍教黎庶受摧殘 百計營謀轉不安 熱念已隨明

月冷隻身苦覺曉 風寒性愚何解為 官樂才短

知作吏難五斗不貪歸且去故園山水醉中看
留別淙城士民

沈承勳

同寅幸共濟和衷退避甘心拜下風久企詩豪劉
夢得夙欽吏治陸宣公才如穎士威尤重澤衍涪
翁譽並隆惆悵今朝回錦里那看良友別匆匆
代庖已是屆瓜期自問何堪繫去思四境輿情安
且靜一年治術浚無竒甄陶頗欲成人美愷澤還
應道我慈清夜捫心能信處幾曾片念涉於私
未盡心傳便欲行最難分手是諸生詩文以外皆

新甯縣志

卷八

藝文詩

六

餘事談論之間有至情立雪一時來馬帳乘風萬
里奮鵬程依依作別無他語仁聽秋高賦鹿鳴
捧檄淙城得卸肩紳耆話別更堪憐曾遭蹂躪幾
三月欲復瘡痍尙數年愛士未嘗存膜視恤民何
忍計腰纏隱侯一點心常在事後回思自豁然

詠何貞女

黃英文

貞操曾歎古今難何況弱齡志已端廿載冰霜悲
寡鵠畢生節義奏孤鸞冬花帶雪心先死勁竹臨
風氣愈寒欲提銀毫存實錄令人一字一心酸

一曲離鸞紀甚辛，凄風雷雨倍傷神。感恩激烈情
還易就義從容，性始真入室未瞻夫婿面，蓋棺猶
是女兒身。從今更築懷清室，取此芳徽媿古人。

題烈女徐崧雪圖

沈承勳

我讀烈女傳，山高欽仰止。我披貞女圖，崧高瞻彼
美。彼美繫何人，糸出東海氏。隨父到淙城，鱣堂植
桃李。晨昏兩問安，每膳必親視。少小學禮儀，長大
嫻針指。父以虎女居，那能配犬子。乘龍尙渺乎，化
鶴先逝矣。囊空安得歸，鷓鴣從茲始。菽水侍萱幃，

新甯縣志

卷八

藝文詩

七

炊斷典簪珥，不字又十年。滇寇忽蜂起，蔓延至蜀
東。曠野皆虎兕，撲向岩渠來。欲抗無高壘，霎時四
面圍。困守孤城裡，自分不能生。從容囑兄弟，臨難
並捐軀。誰延一綫祀，回顧雙鳳雛。漣漣徒泣涕，教
把裙腰縫毋污。清白體與其失節生，不如仰藥死。
一死足千秋，芳徽載青史。我來宰是邦，聞風悲且
喜。巾幗有血心，鬚眉何足齒。常則孝思存，變則貞
節矢。全孝復完貞，雖死猶生耳。阿兄索予詩，雲烟
揮滿紙。孤高並崧齊，潔清與雪比。展圖頓豁然，命

名良有以咏餘字亦香聊以當銘誄

詠徐烈女

周紹鑾

烈女姓徐氏名崧雪前邑訓導徐公蔭遠之女
性幽閒質聰穎幼耽吟詠長習經史尤工女紅
善丹青得親歡心擇偶未字父歿流寓淙城奉
母以孝聞同治紀元正月八日滇逆圍新城女
謂昆季曰大難之興關乎劫數惶怖奚益旣無
盡忠之責應有全孝之義兄及弟當存宗祀勿
亂五中吾輩完貞有死無二語訖手自調鴆昆

新甯縣志

卷八

藝文詩

八

季慰止之女曰彈丸山城守疎援絕不陷何待
此何時也猶作苟且想以自寬耶竟率姪女碧
紋碧瓊分毒服之閉戶紵針密縫衣袴於初九
夜三更同時死焉鄭君鶴樵爲繪崧雪圖前署
邑令沈公西銘題以詩己巳春余就邑幕適都
人士囑修邑乘採訪軼事從孫君瑞菴聞其略
因綴長句並誌端末以示景仰云

乾坤正氣無時歇英靈往往鍾巾幗激烈操兼慷
慨行芳名千古仰崧雪崧雪爲誰徐氏女父曾司

鏗聲振鬢序趨庭早習詩禮儀舉案未偕秦晉侶鎖
口深閨嫺詠絮綠窗時課史經義織襄巧絕號鍼
神餘技尤擅寫生譽阨才反被多才誤霜寒忽殞
靈壟椿樹北堂萱草解承歡淡泊家風守荆布承平
日火寇爲災滇匪如毛捲地來淙城官民譁且震
安危誰仗出羣才人盡倉皇女獨豫自謀兼爲承
先計臨難羞存苟免思珍重雁行宜引避至孝全
貞各從理一局安排早定矣親手調鴛如調羹此
際芳心已先死兄曰少安弟曰止女則曰嘻勿語

新甯縣志

卷八

藝文詩

九

此內無守禦外無援巢覆湏臾復何俟卓識無慚
女丈夫猶女偏憐兩鳳雛仰藥能分一杯飲重泉
不失雙明珠心如金石體如玉策妙縫裳斷仍續
留得清白還太虛此身可殉不可辱瓊漿一滴罌
西米脂山城半夜杜鵑啼壬戌孟春月初九正是烈
女授命時噫噓嘻舍生取義人幾何第恐臨危顧
口忘多烈女從容竟如此此風此節當不磨吁嗟乎
此風此節當不磨雪之皎皎松峩峩

三則題

山陰 胡元翔 伯槐 監生

天地英靈無時已不鍾男兒鍾女子卓哉巾幗有
完人芳名千載留青史徐公之女冰雪姿自昔淙
城隨父仕女紅繡素夙所嫻競詡鍼神鬪十指性
成貞孝肅閨儀視膳高堂奉甘旨餘事尤耽詠絮
才拈毫兼擅徐熙技椿木忽遭風雨摧長侍萱花
色微喜光陰荏苒年復年孤芳未易卜連理無端
滇寇正鴟張人心震懼烽煙起外援內禦兩難憑
紙糊新甯安足恃謂兄引避善全宗女心自分古
井水仰藥從容就義時意及猶女爲兄累分羹回
樸

新甯縣志

卷八

藝文詩

十

飲甘如飴密縫裙袴全貞體一死千秋骨自香綽
襃貞頌

九陛我今旅食累猪肝側聞此事深仰企鄭君寫作崧
雪圖命名取義良有以吁嗟乎竒女竒才復竒行
臨難捐軀竟如此泰山鴻毛孰重輕多少鬚眉當
愧死

淙城八景題詠

周紹鑾

峩城雪霽

巍巍西峙玉芙蓉霽色遙分雪萬重十丈紅塵飛
不到寒雲高破一聲鐘

古碣雲封

飛泉倒挂絕塵埃洞口癡雲撥不開最是碧潭新
雨霽夕陽西映錦成堆

寶泉夜月

野曠烟低萬井幽碧雲斜湧一輪秋月華如水清
涼夜山下冷泉靜不流

珠峽曉煙

山痕中斷水痕連曉色空濛鎖碧煙峽底秋聲洶
不盡珠光飛上白雲顛

轟峯觀榜

石嶂天開玉掌平春風拭目快題名居山莫負凌
雲志好向金鰲頂上行

文筆凌霄

三台高拱接文昌雲錦書成百尺芒塔上晴嵐巖
畔雨都分秀色到宮墻

白石陰晴

秀石晶瑩擬玉琛也宜晴霽也宜陰天然變化呈
圖妙雲影烟光活一岑

墨池雷雨

方丈靈池釀太和黑雲低處湧輕波爲霖早慰蒼
生望雷雨經綸自不磨

和前韻

胡元翔

峩城雪霽

峩城高插玉芙蓉日送鴻飛幾萬重雪霽頓開銀
世界數聲清遠隔林鐘

新甯縣志

卷八

藝文詩

十一

古碕雲封

白雲深處絕塵埃巖畔飛泉一道開惟有碧潭堪
證意洞天錯認瞿塘堆

寶泉夜月

月挂山巔一色秋寶泉夜景最清幽參天孤塔虛
無際萬井澄波翠欲流

珠峽曉煙

珠峽崢嶸斷復連雙峰缺處縉朝煙羣流作勢爭
趨壑雨散雲飛百尺巔

嘉峯觀榜

孤峯矗立暮雲平
得意思留雁塔名
轉盼春風欣
有路蓬萊仙島許
閒行

文筆凌霄

瑞啟三台運際昌
文明筆底燦光芒
山居具有冲
霄志秀挹芙蓉對
赭墻

白石陰晴

白石玲瓏見玉琛
微靈炫異卜晴陰
陰晴變化呈
元妙神徃重巒與
翠岑

新甯縣志

卷八

藝文詩

十三

墨池雷雨

殷雷鼓盪助陽和
澤沛天池漲碧波
霖雨蒼生差
慰望牂牁作記豈
能磨

峩城雪霽

達縣舉人 廖正笏 撰之

峩城之名高千古
矗矗去天一尺五
鬼斧神斤削
不成朝三暮四作
雲雨陰陽變態渺
無邊
錘
靈不計年想到仙
人踏雪處遙空卽
是大羅天
攜
筇直欲上山頭
山勢蜿蜒萬壑幽
一自晴明開霽
後盪胸猶憶幾生
修君不見將軍廟
貌空前後

殿雷霆霹靂走人傑還因地有靈兒孫環列皆培
樓

古碕雲封

千年古碕驅雲走萬疊寒雲鎖碕口雲外飄搖來
碕仙碕中彷彿招雲母朝朝暮暮起祥煙空際遙
開一線天更有清泠泉水出潏洄抱處徹中邊碕
中霞蔚並雲蒸萬丈光芒萬點燈莫是然藜來太
乙學仙有術亦飛昇非空非色兩相證不作禪關
也入定一點浮雲任卷舒松風水月心心印

新甯縣志

卷八

藝文詩

十四

寶塔夜月

水爲玉帶山爲屏不盡祥光擁碧亭今夜登臨觀
月上凌空高摘一天星從來鴈塔題長安此地亦
堪壯大觀月白風清留勝賞好風還向月中看問
君誰是補天手哲匠經營曾未有文運不隨文筆
開文人何自空前後登峰已覺壓塵寰况在月光
掩映間步步引人入勝處眾山一覽總難攀

珠峽曉烟

昔有黃牛臥峽邊又聞白馬飲長川巫峰十二巖

門鎖灑瀕堆前起暮煙水有珠兮山有峽珠偏費
峽獻菁華峽珠若弗冲煙起瑞氣何來蒲望誇一
帶祥煙鎖峽口一爲遷客峽中走牟尼串串問誰
穿珠峽之名垂不朽爲有珠聯因有峽蜿蜒竒氣
內充塞曉煙萬疊常相遮本地風光非物色

五嶺峯觀榜

朝拱有情風水傳雙牛對卧苦年年突然平地一
峰起轟轟直將插上天高步雲霄膽欲寒盤龍踞
虎直登壇文風自許文人占榜上題名壯大觀西

新甯縣志

卷八

藝文詩

十五

有峩城東有峰高峰數仞悵雲封每當揭曉鴻臚
唱得意文章報九重不識誰修五鳳樓樓高百尺
俯仙洲鸞箋何必來相助自有朱衣暗點頭

文筆凌霄

寶塔尖尖奎壁聯祥雲繚繞鎖山巔宮牆萬仞遙
相對文筆一枝儼插天塔勢崢嶸位正南離明之
象文明參取懷如授生花筆雲外天香月裏探鐵
畫銀鈎逸少書文人千載奉權輿如椽大筆隨心
運寫到蘭亭恰好初自古文章筆下始淋漓之筆

凌霄起萬言立就掃千軍奪得錦標復爾爾
白石陰晴

石曰磷磷白似帛石之皓皓白如璧壁含暉也無
瑕疵帛受采兮有色澤白石嶙峋佐大山寶光外
溢點朱殷多年毓秀鍾靈處課雨占晴在此間消
息盈虛倏忽過山南山北勢如何陽開陰合疑無
定誰識此中變化多君不見朝作風雲暮作雨吹
噓橐籥誰爲主大山原是小山宮自有神仙入洞
府

新甯縣志

卷八

藝文詩

十六

黑池雷雨

黑雲翻墨忽遮山白雨跳珠點點斑霹靂無端空
際出雷聲又送雨聲還名山聳翠介東北四面風
雲爭物色陽合陰離變態多奇奇怪怪幾人識天
工巧鑿一天池池下龍神變化奇每遇禱祈甘澍
候不先不後順三時君不見牟公生與龍神友兩
兩相知情最厚求雨先求公導之至今猶憶山中
叟

登省耕亭

周紹鑾

亭在署後倚城而作周植桃柳俯映蓮塘萬疊
青山千疇綠塹悉供眺覽每際春秋佳日公暇
登臨亦足觀民俗而課農桑昔名得春前署縣
范公象乾重建嗣邑令陸公爲蔡復易其額曰
省耕

翠亭縹緲倚城端桃柳依依繞竹欄半畝池塘浮
漲暖四圍山嶂鎖烟寒登臨每羨桑麻樂入望應
知稼穡難省識幽風圖繪好召棠郇黍畫中看

詠署後春柳 用王漁洋秋柳原韻

周紹鑿

新甯縣志

卷八

藝文詩

十七

曾向長亭縮別魂翻同桃李附公門愁春態弱渾
無力染黛眉彎似有痕十里板橋人喚渡一帘烟
雨酒沾村曲江韻事分明在除却風流漫與論
劫歷風塵閱幾霜知名曾占古銀塘飛花撲幕香
留硯冷汁沾衣翠滴箱泚水何年傳畫本隔溪有
句詠詩王安能遍繪新宮樣植滿成都碎錦坊
腰肢瘦怯弗勝衣走馬章臺事已非笛不須吹惜
宛轉樹猶如此想依稀垂絲未解留驂住弱絮偏
能學燕飛一曲柳枝成底恨春風樽酒莫相違

增人離緒動人憐池上啼鶯陌上烟客舍魂銷春
脈脈清明節近雨綿綿闔心南浦仍三月回首東
風又一年萬縷吟情揮不盡綠陰深鎖畫橋邊

次春柳前韻

胡元翔

春來何處最銷魂柳色依依綠掩門動引翠樓增
恨事暗勻青黛上眉痕折從昔日還今日栽遍前
村並後村幾度黃鸝聲宛轉雙柑斗酒不須論
曾記嚴寒破曉霜於今瀟灑出林塘舞腰嫋嫋歌
金縷情緒絲絲貯玉箱螺畫眉新京兆尹烏衣門

新甯縣志

卷八

藝文詩

十八

舊太原王由來隄畔多攀折認取旗亭道上坊
翠汁誰家新染衣春光上苑是耶非離愁甚處情
難遣別恨深時夢轉稀兩岸輕烟忙燕剪一天晴
日乳鴉飛柔條有意垂青眼似勸征夫願莫違
輕盈弱態總堪憐不覺韶光入禁烟月挂碧梢張
畫稿花飛紫陌若鋪絲青青客舍逢今日澹澹春
風似去年漫道短長亭畔好最銷魂是灞橋邊

夏日遊金山寺

廖正笏

古寺鎖雲烟登臨欲到巔攀藤期直上拾級敢爭

先爲謁談經地剛逢打麥天
金山回首望眼界豁
三千

秋日遊金山寺

周紹鑾

迤邐入雲峰梯巖路幾重
青分山徑竹綠掩寺門
松花雨空塵障蘿烟破午
鐘樓臺深罨畫訪勝漫
攜筇

翠巘虛無際登臨思渺然
布金應此地卓錫證何
年溪鳥如迎客山花亦解
禪好期塵夢息長伴白
雲眠

新甯縣志

卷八

藝文詩

一九

未遂幽棲志名山快此遊
烟開千嶂霽雲鎖一天
秋苔冷青沾屐篁深綠滿
樓相逢僧話好竹院暫
勾留

嘯傲烟霞古蒼茫對碧岑
萍遊嗟浪跡蓮界淨塵
心雲影環窗活秋聲入澗
沈夕陽歸路晚踏遍綠
溪陰

秋日遊金山寺次前韻

胡元翔

道出西郊迥雲峰露幾重
濃陰三徑竹爽籟一林
松金粟霏香界泉聲和梵
鐘尋幽僧指引健步漫

支筇

丈六金身相裝成
果儼然劫灰談往事
護法憶當年
佛子能忝偈塵
心豈解禪羨他雲外鶴
松下正
酣眠

携伴同探勝相邀
著屐遊雲山原有約
風景恰當
秋齋飯供香積番
經貽寺樓貪看林壑趣
茶話又
勾留

木葉林初脫晴光透
遠岑烟霞成
固癖泉石已盟
心異地萍蹤合
寥天雁影沉
奚囊探妙句
夕月一

新甯縣志

卷八

藝文詩

三

庭陰

歌

周易六十四卦名便記總括歌

邑舉人

張

冕字臞翁

入純之卦為宮首下從初爻變至三五六上卦二
三下下卦却從對宮安七八上卦變中爻七下對
取入歸元

新甯縣志

卷八

藝文歌

聯

大門

竇容遂

先勞勉遵聖訓

好惡願協民情

二門

枉道行私舉步怎能無錯處

愛民潔已做官那得有錢來

大堂

噤笑間可識兒女真情誠求未至敢言無不是的

新甯縣志

卷八

藝文聯

父母

政教內自具權衡妙理稱量得宜方信沒錯斷了

分毫

居官無別法能清心能慎思能勤職便是循良實

際

行政有先施不欺君不賣法不害民好尋賢哲風

規

二堂

準民心為己心百般體恤祇求應感無殊遠邇

奉國法如家法千遍檢點但願公私可對君親
三堂

俯仰無慚何必焚香煩夜告

居行有準還須執玉叩賢關

岩渠書院大門

講舍初開漫云雅化追齊魯

英賢畢萃好向遺編溯洛閩

四維堂

由灑掃應對尋來便見孔顏樂處

新甯縣志

卷八

藝文類

從易書詩禮探出自知伊洛心源

關帝廟

浩氣縱橫天爲用

精誠昭揭聖之忠

時雨齋

周金紳

甘雨來時萬井桑田停濫瀆

薰風吹處一庭蕉影韻清琴

省耕亭

集句

杜瑞徵

稼穡作甘民之所欲

室家相慶邦乃其昌

省耕亭 集句

周紹鑾

四野綠雲籠稼穡

一亭青靄鎖烟嵐

其二 集句

稼收平野潤

雲斂衆山晴

國公祠

守土竟同亡况忠義一門授命無慚臨大節

新甯縣志

卷八

藝文聯

三

如公原不死仍寅僚千古明禋有典祀遺型

趙鏊官大理寺評事詳見宦績

嘉靖五年丙戌科

熊進官行人詳見宦績

傅德堅官丹陽縣知縣詳見宦績

以上進士六人業經通籍故鄉科年分一概從畧

熊希古官雲南兵備副使詳見宦績

一年戊辰

新甯縣志

卷八

選舉進士

國朝進士

